

Sehr geehrte Herr Stadtpresident, gschetzi Stadt und Gmeindrät
verehrti Bsuecheinne und Bsuecher, gschetzi Vertreter vo dä Präss

Vor eme Jahr bin ich zum Präsident gwählt worde. I minere Asprach zu mim Präsidial Jahr han ich für fairi und konstruktivi Vote plädiert. Im abglaufene Jahr han ich während 9 Gmeindratssitzige meistens sottigi Vote dörfe ghöre.

Mir händ i mim Präsidialjahr interessant Gschäfte dörfe da ine behandle, mir händ au e grossi Azahl Ibürgerige vorgno und ein Sitzig gar nur dä Ibürgerige gwidmet. So hämer bis Endi 2007 die astehende Ibürgerige starch chöne Abboue. I dä Zwüscheziit stönd scho wieder einigi a, es Gschäft, wo eus also au in Zuekunft nöd wird loslah. Mir händ im vergangene Jahr sogar ei Ibürgerig abgelehnt, öppis wo's i dä Vergangeheit sehr sälte gäh hät.

D'Wisig Schuelhuus Eidmatt 2 und Kulturhalle Glärnisch händ mir mit understützig vo sämtliche Partei au bim Volk erfolgrich durebracht.

Mir händ sogar chöne im vergangene Dezember dä Stüürfuess chöne um 2 % sänke. Immerhin um 2 % wo doch, wänn mäh das realistisch alueget au durchus meh dringläge wäri.

Gschetzi Kolleginne und Kollege, ich han das Präsidialjahr als es interessants und Ziit intensivs in Erinnerung, näbscht all dene Gmeindratsitzige, sind nomal soviel Bürositzige dezue cho und ich han gebrauch gmacht vo mim Rächt, a Kommissionssitzige chöne debii z'si. Ich han so en interessante Iblick übercho i die sehr wichtigi Kommissionsarbet und han au gseh, dass i dä Kommissionen fair und konstruktiv debattiert worde isch. Fairplay, spielt i eusne Kommissionen und meischtens au da im Rat. Es Aliege, wo mir wichtig isch. Mir müend au anderi Meinige chöne Akzeptiere und eus mit dene Usenandsetze.

Fairplay isches au, wo ich im kommende Jahr erwarte, wänn ich nüme da obe ufem Bock sitze. Und ich muess ihne erlich säge, ich freu mich druf, au wieder zu de einzelne Gschäft öppis dörfe z'säge. Nachdem ich jetzt gut 3 Jahr da obe gsässe bin und mich meistens im Hindergrund han müesse halte. Ich wird also au wieder dörfe mitrede, öppis, wo mir vorallem im vergangene Jahr sehr gefällt hät. Es isch nöd immer eifach, da obe z'sitze und zue z'lose, wänn mä doch sälber au e Meinig hät.

Zum Schluss blibt mir ein wichtige Punkt, wo ich uf kein Fall vergässe möcht

Ich bedanke mich bi dä Mitglieder vom Büro, dä Lucia Eigesatz, em Gody Pfister, em Thomas Hartmann, em Simon Kägi, em Gernot Schreiber und dä Gisueppina Spescha für die wüchlich tolli zäme Arbet im vergangene Jahr. I all dene Bürositzige händ mir immer speditiv und konstruktiv uf's Ziel higschaffet, dank eurer mithilf han ich entlastig gha und d'Sitzige immer guet über d'Rundi bracht.

Ich wünsche Ihne allne im Jahr vo dä Fuessball EM viel Erfolg und vorallem immer Fairplay, im Spiel und i dä Politik.